

La Academia Rezia ha festivà ils 55

Commemoraziun tant a Friburg sco a Cuira

■ (anr/gc) Igl è usit che la Corporaziun Academica (CA) Rezia commemore-scha mintga tschintg onns sia fundaziun. Quella è succedida 1957, pia avant 55 onns, a Friburg e tala da la Rezia veterana in onn pli tard a Cuira. Quai è la raschun ch'i dat mintgamai festivitads en omadus lieus. Uschia era quest onn: l'entschatta da november a Friburg e sonda passada a Cuira cun ina fitg gronda participaziun dad activs, anteriurs e cun dals lur. In comité d'organisaziun – cun *Annina Maissen* e *Jasmin Venzin* sco copresidentas – ha preparà e pudì preschentar in vast program. A Friburg èsi stà ina gronda canorta festiva cun fondue ed a Cuira ina propi bella occurrenza.

Visità il museum ed il servetsch divin

L'entira festività commemorativa è sa splegada en la vischinanza da la Curt a Cuira. En il Museum Retic ha ses directur, *Jörg Simonett*, conduì nus tras l'exposiziun «Crair e savoir». Impressiuant quai ch'el ha mussà e declerà.

Suenter in rinforzament (apero) en la Tschalaria èn ins sa rendì tar il servetsch divin en la catedrala. In grond plaschair èsi stà dad avair il nov avat da Mustér, Vi-

geli Monn, sco celebrant e predicatur tar quella messa chantada en rumantsch e tudestg. Il predi è stà en l'ensaina da l'advent. L'arrivada dal Segner dettia curaschi. Ins na duessia perquai betg vesair be il negativ, mabain er il bun e senn per uss e l'avegnir ed uschia er ir la via al salit. Bellas supplicas en rumantsch e tudestg èn suandadas, spezialmain per la Rezia. A fin è la messa giubilara ida cun il «Riesenkampf», l'imni uffizial da la Societad da students svizzers.

Past festiv ed en buna atmosfera

La vasta sala dal Marsöl è s'emplenida fitg bain. Bainvegni fan simpaticamain las duas copresidentas. Lunga è la retscha da meritaivels e prominents stada. I reveva in'atmosfera da festa cun tut quai che s'auda latiers – tant durant il past sco il bal.


Professura da rumantsch – co vinavant?

La Rezia veterana ha – cun *Barbla Etter* – ina zunt engaschada presidenta. Bel èsi stà ch'ella ha tegni l'allocuziun festala davart quai che s'auda ensemen: «Rezia e professura da rumantsch a l'Universitad da Friburg». En rumantsch, talian e tu-

destg ha l'assistenta da quella professura laschè passar revista entschatta e svilup dal lectorat rumantsch a la professura ordinaria.

La referenta è sa dumandada co i giaia vinavant suenter che *Georges Darms* è i en pensiun questa stad. Pervi da paucs students èsi daventà da la professura ordinaria ina tala associada. Il chantun da Friburg na veglia betg finanzia persul quella professura. Il chantun Grischun è sa declerà pront da pajar la mesadad dals custs – sut la cundiziun ch'il persunal da quella professura surpiglia er incaricas a la Scol'auta da pedagogia a Cuira. La dumonda da las finanzas na saja dentant anc betg reglada. Na pussaivel saja i dentant sut questas cundiziuns da pudair offrir in studi cun rumantsch sco rom principal.

Pertutgant il lectorat rumantsch sajan ins uss en la medema situaziun sco avant 55 onns. Ins stoppia vinavant cumbatter per la professura rumantscha, surtut per raps. Paucs commembers haja era la Rezia. Barbla Etter è sco assistenta – cun anc in auter Rezian – engaschada tar professura. Els sa dettian fadia da far er en quel regard il meglier ordlonder per la Corporaziun Academica giubilara.



Avat Vigeli Monn ha celebrà il servetsch divin per il giubileum.



Barbla Etter, presidenta da la Rezia veterana, ha salvà l'allocuziun festala.



Salid cun la bandiera.

FOTOS G. CAPAU



Las copresidentas: Jasmin Venzin ed Annina Maissen